

# Hoz es il Di mundiel dal teater



# Il Di mundiel dal teater

Hest tü eir già udieu la frasa: «Schmetta da fer teater!»? Forsa cha tieus genituors u tia magistra haun dit que, cur cha tü hest fat da que cha nu's vess da fer ... Per exaimpel cur cha tü hest fat da clown! Ils 27 marz hest tü üna buna s-chüsa per fer teater scu cha tü voust. Tü poust dir: «Schi, hoz fatschi teater! Ils 27 marz es nempe il Di mundiel dal teater.» Quist di mundiel do que daspö il 1961, daspö cha l'institut da teater internaziunel l'ho proclamo. Managio cun teater es cò il gö da rollas, dime-na persunas chi giouvan ad otras persunas per quinter ün'istorgia sün ün palc. Quista fuorma da divertimaint do que già daspö millis dad ans. Ils vegls Grecs haun già giuvo


cumedgias e tragedias. Cumedgias sun töchs divertents, tragedias da l'otra vart sun istorgias tristas chi glivran mel. Ils actuors purtaivan mascras per giuver las differentas rollas. Ün dals autuors da teater ils pü renumnos d'eira il scriptur inglais William Shakespeare. El ho per exaimpel scrit il teater «Romeo e Giulietta», l'istorgia da duos inamuros chi nu suos-chan gnir insembel, perque cha lur famiglias haun dispütta üna cun l'otra. Shakespeare ho scrit il töch avaunt passa 400 ans ed il tema scu eir il teater sun aunch'adüna actuals. Teater pera dimena da fasciner als umauns, listess cura ed inua sün quist muond.

**Est tü già üna vouta sto/steda a garder ün teater?**

**Do que ils 27 marz ün teater per iffaunts in tia regiun? Tschërcha i'l internet e vo a garder!**

**Che teaters hest tü gugent? Teaters cun poppas, cun mascras u cun drettas persunas?**

**Giouvast tü svesc gugent teater?**





# Nus giuvains teater!

1

## Applaus


La grupp d'iffaunts tschainta per terra e guarda vers la porta u vers la tenda. Ün iffaunt aintra u vain davaunt la tenda. Ella u el aintra tuot normel, cun ün nes cotschen u cun üna mascra. La grupp d'iffaunts (il public) do applaus. Zieva cha'ls iffaunts haun applaudieu, fo l'iffaunt ün inclin e tschainta sper ils oters iffaunts. Ün oter iffaunt aintra cun u sainza requisit e la grupp applaudescha. Uschè vo que inavaunt, fin cha minch'iffaunt ho pudieu giodair l'applaus e fer ün inclin.



## Pantomima

Ün iffaunt tscherna üna bes-cha u üna chosa e preschainta la rolla tschernida sainza discuorrer u fer rumuors. Ils oters stöglan ingiuviner che chi'd es managio. Eir pussibel: fer pantomimas da misters.





### Rudè d'emoziuns

La gruppà sto in rudè. Ün iffaunt do intuorn ün'emoziun. Minch'iffaunt do inavaunt quell'emoziun a l'iffaunt sper el. Uschè vo que üna vouta intuorn, fin cha l'emoziun riva darcho tal iffaunt chi ho cumanzo. Uossa vain landervi il prossem iffaunt. Variantas per musser l'emoziun: ün'exclamaziun, musser l'emoziun be culla mimica, cun movimaints, scu las bes-chas, liun = curaschus, chaun = cuntaint, chöd = superbi, mür = tmücha, etc.


Ler la giazetta  
 Ün iffaunt sto d'üna vart da la stauza, las arains vers la gruppà, e legia la giazetta. Il rest da la gruppà es da l'otra vart da la stauza e tscherna ün'emoziun (u üna bes-cha). In quell'emoziun cumainzan els uossa a's mouver plaun vers l'iffaunt chi legia la giazetta. Quel as volva e la gruppà sto dalum salda (freeze). Scha l'iffaunt da la giazetta ingiuvina da che emoziun cha que as tratta, vain müdo rolla, uschigliö legia el aunch'üna vouta la giazetta e la gruppà s'avicinescha darcho.

### Chi sun eau?

Our dad üna chascha cun vstieus, requisits e mascras per as travestir piglia ün iffaunt trais chosas e las tira aint. Ella u el as preschainta davaunt la grupp d'iffaunts e giouva üna persuna, üna bes-cha u üna figüra our dad ün'istorgia u d'ün film. Ils iffaunts stöglan ingiuviner la rolla da l'iffaunt. Chi chi ingiuvina inandret as suos-cha travestir scu prosma u prossem.

### Mascras

Zambragè mascras da differentas bes-chas our da plats da chartun e giuvè cu cha quistas bes-chas faun üna festa insembl.





### Al restorant

Giuvè üna scena al restorant. Ün ifaunt es il giast, ün oter serva, ün terz es il cuschinunz u la cuschinunza u qualchos'oter. Inventè auncha dapü rollas e giuvè las differentas variantas:

- Il giast posta spaghets, ma survain ün pesch ...
- La cuschinunza ho ün'assistenta u ün'assistent chi metta sel impè da zücher illa crema da vaniglia ...
- La camariera mangia sves nov chicken nuggets ed il giast survain be pü ün chicken nugget ...
- Inventè egnas scenas!